

SARGA 1
ARAN LAN WEWIDANGAN DESA
Pawos 1

- 1) Desa Adat puniki mawasta Desa Adat Tuban.
- 2) Sangkaning Desa Adat puniki mawasta Desa Adat Tuban saantukan manut babad: Daweg warsa 1400 - 1500 sane lintang panagara Majapahit pacang ngilikang wewidangan Nusantara Indonesia rauh ring jagat Bali. Prajurit Majapahite sayaga pacang ngaonang jagat Baline, malayar tur malabuh ring segara tepi kauh genah Air Port Ngurah Raine sane mangkin. Rikala punika perahu sane malabuh kagebug antuk ombak sane ageng tur perahunnyane bencah. Segara genah perahune bencah kawastanin Dalem Perahu Labuhan Perahu. Saantukan prajurit-prajurit Majapahit punika wit saking jagat Tuban Jawi Timur tur matilar saking palabuhan Tuban Jawi Timur, alase sane madurgama ring tepi segara Labuhan Perahune kawastanin Tuban, makacihna genah masayuban prajurite saking Tuban Jawi Timur.

Sewosan ring punika alase sane madurgama punika kaanggen genah ngadu kadharman kalawan adharma para istri sang para ratu jagat Badung, Sapasira istrinia kabawos iwang tur kakutang ring tengahing alase inucap. Prade istri punika kantung urip, punika sujati istri sane tan malaksana corah, tur yan istri punika seda makacihna istri sane malaksana tan rahayu. Dadosnyane alase punika tenget tur mateeb (nakutin). Kruna teeb sue-sue kaucap tuban. Sue-ningasue alase punika kadadosang desa tur kawastanin Tuban. Genahnyane pastika ring genah Air Port Internasional Ngurah Rai sane mangkin. Kacihnayang taler kapanggihin setra ring tengahing Air Port sane sampun kagingsirang ping kalih saantukan kawentanang wangunan lapangan terbang.

- 1) Jebar kakuwub wewidangan mawates nyatur
 1. Sisi wetan segara.
 2. Sisi Kidul Desa Adat Kelan
 3. Sisi kulon segara.
 4. Sisi lor Desa Adat Kuta
- 2) Wewidangan palemahan Desane kepah dados 2 (kalih) Banjar Suka - Duka, luire :
 1. Banjar Pesalakan Tuban
 2. Banjar Tuban Geriya.

SARGA II
PATITIS LAN PAMIKUKUH

Pawos 2

Desa adat Tuban puniki ngamanggehang pamikukuh:

1. Pancasila
2. UUD 19
3. Sahanan Peraturan Negara Republik Indonesia.
4. Agama Hindu, pamekas Tri Hita Karana, manut tatwaning Bhuana Agung.

Pawos 3

Luir patitis desane :

1. Mikukuhang miwah ngrajegang Sang Hyang Agama
2. Nginggilang tata prawertining Agama.
3. Ngrajegang pasukertan desa saha pawongania sakala niskala.

SARGA III
SUKERTA TATA AGAMA

Palet 1

Indik Dewa Yadnya

Pawos 4

- 1) Luir Kahyangan ring Desa Adat Tuban :
 1. Kahyangan Tiga : Pura Puseh, Pura Dalem (Dalem Kahyangan) lan Pura Desa/
Bale Agung
 2. Pura Dalem Panataran, magenah ring Pura Dalem Kahyangan.
 3. Pura Panyarikan (Bale Agung)
 4. Pura ring soang-soang ubanjaran maka stanana Ida Bhagawan Panyarikan.
- 2) Rahina piodalan soang-soang pura inucap ring ajeng :
 1. Pura Puseh, Desa/Bale Agung (Panyarikan), rikala Sukra Paing Wuku Dungulan.
 2. Pura Dalem Kahyangan lan Panataran, rikala Purnamaning Kapat.
 3. Pura ring soang-soang ubanjaran manut banjar soang-soang.
- 3) Pangaci sane kalaksanayang nista, madia, utama manut kecap sastra Agama kaduluran pararem ring kawentenane.
- 4) Pangempon soang-soang pura manut dresta.
 1. Kahyangan Desa : Pura Puseh, Pura Desa, Panyarikan/Bale Agung, Pura Dalem Kahyangan lan Pura Panatan kaempon antuk Desa Adat Tuban, kasanggra antuk banjar soang-soang silih ganti.

2. Pura Panyungsungan Palawatan “Dewa Ayu” magenah ring Pura Ratu Gede Karangasem Tuban, kaempon antuk Desa Adat Tuban, kasanggra antuk banjar soang-soang, aci manut ring Pura Ratu Gede Karangasem Tuban.
- 5) Pura ring ubanjaran soang-soang kaempon antuk banjarnia soang-soang.

Pawos 5

Swadharmaning Pamangku, Luire :

- 1) Nganterang upacara piodalan ring Kahyangan utawi ring soang-soang pakubon Krama Desa mwah nganturang panawuran/paneduhan soang-soang Krama Desa.
- 2) Sang Mapenawuran patut masadok ring prajuru mangda kailikitayang tur kaungguhang druwen desa, luire :
 1. Panawuran upakara lan wewalen
 2. Panawuran leluwes lan mole-mole
 3. Sesari-sesari langkung ring 500 wijinan jinah bolomg
- 3) Pamangku Kahyangan Desa kawenangang :
 1. Nibakang panugrahan ring pamangku prasanak lan Krama Desa manut pararem.
 2. Polih panampa rikala ngamargiang pujawali, sakeng Pamangku Kahyangan sewosan, wargan Pamangku Prasanak.
 3. Polih Panyepuhan prade katiwakin antuk salah sinunggil krama sakewenten prade mabukti manut tri pramana kaiwangania patut nyepuhin raga.

Pawos 6

- 1) Rikala upacara piodalan sampun galang sasih (galah dadi) wenten salah sinunggil Pamangku/wargan dane Pamangku cuntaka sangkaning lampus, upacara kamargiang antuk Pamangku Kahyangan Desa sane tan kapiambeng, tur prade tan wenten purun patut nuwur Sang Sulinggih pacing muputang Yadnya. Pamangku tiosan maka panampa panugrahan Sang Sulinggih.
- 2) Pamucuk karya ring Kahyangan Desa kaampok Krama Banjar manut dresta.
- 3) Krama Banjar sewosan ring pangampok patut nyarengin ngayah nyihnayang pangubakti ring Bhatara sami, saha soang-soang krama banjar inucap tragia makta kewangen miwah sekar, kaangen muspa saha tan kalugrayang ngawentenang ilen-ilen sawidangan Desa Adat Tuban sane matetujon arta bhrana.

Pawos 7

Patias utawi pikolih Pamangku, luire :

- 1) Apahtigaan sesari ring Desa
- 2) Leluputan, lupu ayah-ayahn miwah papeson
- 3) Patias sewosan manut pararem

Pawos 8

- 1) Pamangku kagentosin riantukan :
 1. Lampus
 2. Pinunas ngraga, menawite kageringan, lan siosan punika (manut pararem)
 3. Kawusang menawi malaksana asta dusta (anayub cor)
- 2) Prade Pamangku kawusang sangkaning malaksana asta dusta kadanda manut pararem saha ngwaling panelas prabeya pawintenan pecak
- 3) Prade ngalap rabi risampun kalugra olig istri niamiwah bandesa Adat, patut nyepuhin raga

Pawos 9

Kasukerta Kahyangan kadi ring sor:

- 1) Tan kalugra ngranjing kapura :
 1. Sang cuntaka sangkaning sebel raga utawi kalayonan.
Sebel raga luirmia :
 - ha. Sebel kandel(ngraja swala), salami dereng mabersih.
 - na. Sebel sangkaniang madruwe oka (wawu embas) salami akambuan(42rahina), tur sadereng maupakara.
 - ca. Sebel pangantenan, salami dereng mabiakala.Sebel kalayonan : manut sengker.
 2. Makta sahanan barang sinanggeh ngletehin, luire : tulang jadma, rah, lan siosan punika
 3. Sato agung sajawaning mapepada (yadnya).
 4. Mabusana tan manut kadi tata caraning ngranjing ka Pura.
 5. Sadereng polih uwak-uwakan (pituduh prajuru)
- 2) Pratingkahe tan wenang ring Pura :
 1. Pasumpah (anayub cor), sajawaning pituduh prajuru.
 2. Makobetan, makolem lanang istri dados asiki (masesenengan), mabacin/mawarih, menahin wastra/pusungan, lan piosan punika
 3. Munggah tedun palinggih, sajawaning panugran Pamangku, wiadin prajuru.
 4. Ngamargiang tirta, sajawaning Pamangku utawi Pamangku Sanak/Sulinggih.
- 3) Prade wenten jadma karawuhin ring pura kengin kapintonin, prade rumasa kasumangsayan, yan tan wyakti jadma punika kadanda manut pararem, asapunika taler pamidanda mamurug angka (1) miwah (2) ring ajeng.
- 4) Prade Kahyangan kahanan durmangala, makadi kapancabaya kahanan wangken sato agung, karubuhan, lan siosan punika pamangku patut pramangke nyadokang ring prajuru mangda nyamuang Krama Desa tur ngwentenang upacara upakara sapatutnia.

Palet 2
Indik Resi Yadnya
Pawos 10

- 1) Ring soang-soang Pura ring Kahyangan Tiga kawentenang Pamangku.
- 2) Ngadegang Pamangku manut dudonan:
 1. Anyanjan (nunas pawuwus Widhi) ring natar Pura.
 2. Ngwilang sakeng turunan utawi ngwaris.
 3. Prade makekalih ring ajeng tan wenten, wawu kapilih sakeng Krama Desa, manut pararem.
- 3) Tan kawenangang kaanggen Pamangku, luire:
 1. Cedangga luirnia: peceng, perot, cunggih, lan siosan punika.
 2. Kageringan liurnia: sakit ila, ayan, buduh, lan siosan punika.
 3. Sapasira ugi sane tan kararemin antuk krama Desa.
- 4) Prabeya kapemangkuan :
 1. Adiksa Widhi (ngawintenang), kamedalang saha kamargiang antuk sang ngadegang, makadi Krama Desa Utawi pangempon Pura soang-soang.
 2. Pamitrayadnyania riwekas taler patut kasungkemin antuk Sang Ngadegang

Pawos 11

- 1) Sang pacang mapudgala (swi jati), sajawaning nunas panugrahan Sang Rumawos (Parisadha miwah Kantor Agama) taler patut masadok ring prajuru Desa.
- 2) Pajuru inucap patut sareng nureksa nitenin mangda sulur kalih pamargine jati-jati manut kecapin Agama makadi kacedaangan, lan siosan punika, saha sareng nyaksinin pamargin upakarane.
- 3) Sapupute Prajuru Desa patut digelis ngentosin parab Sang diniksan ring sahanan ilikita, antuk biseka kawikon manut panugrahan nabenia, saha kasiarang ring pasamuan Desa/Banjar.

Pawos 12

- 1) Sajawaning Pamangku, Sang pacang mawinten maka buatan pacang mamargi nyonteng, dalang, sakaluir jagi ngenterang Yadnya, patut masadok ring prajuru.
- 2) Prajuru Patut ngawas nitenin mwah wenang ngalangin prade kacihnan sasar kakecap mwah dresta tur sareng nyaksinin upacara upakara saha salanturnia nyiarang (nyarwakaang) ring pasamuan Desa/Banjar tetep rawuhing wates kawenangan pangenter yadnyane.

Pawos 13

- 1) Krama Desa/Banjar katuntun antuk prajuru sareng ngawas nitenin mangda sahanan yadnyane sane kawentenang kaicen pamatur olih Pandita utawi Pinandita (pamangku, Dalang, sakaluir manut kawenangania soang-soang).
- 2) Prajuru patut nuntun saha ngamanggala krama Desa mikukuhin linggih para wiku mwah Pinandita ring wewidangan Desa Adat Tuban.
- 3) Ngaturin Ida utawi Sang muput yadnya dana punia nganut wibuh kancit karyane.
- 4) Sakeng ateleb mapiresep pawisik lan pustaka suci pakaryan Ida Resi manut ring pidabdab Agama.

Palet 3

Indik Pitra Yadnya

Pawos 14

- 1) Pangupakaraan sang lampus :
 1. Antuk mendem utawi ngeseng.
 2. Atiwa-tiwa utawi upakara pangabenan, tur sane kengin kaaben ring risampun ketus untu, prade during ngawit sakeng yusa tigang sasih (asambutan) patut kaabenang nglungah.
- 2) Upacara upakara pitra yadnya riwusan kaabenang munggah daun bingin (ngrorasin), wawu kamargiang nglinggihang Dewa Hyang Batara-Batari.

Pawos 15

Swardharmaning lan tategenan prade wenten krama lampus :

- 1) Sang kaduhkitan patut :
 1. Nyadokang ring Kelihan Suka Duka tur nunasang tetimbangan ring kawentenania.
 2. Nganturin Banjar ngrombo makarya eteh-ete sawa, maka panyembrahma canang mwah lanjaran.
- 2) Swadharmaning Desa/Banjar :
 1. Prajuru maritatas pamargin sang kaduhkitan, napi pacang kapendem utawi lantur kaabenang.
 2. Nepak kukul pawos 46 angka 3
 3. Panyanggran Banjar salanturnia :
 - ha. Soang-soang krama nedunin patus manut pararem soang-soang ubanjaran, asapunika taler prade lantur.

- na. Krama Banjar lanang istri ngambil karya manut dresta saha ngrombo rikala mendem, kapatut mabusana adat sanistane nylempot/ masesenteng.
- ca. Pamargin sawa mwah upakarane mangda dabdab antar,tan kengin maswara gora (magarap-garapan).

Pawos 16

Pamendem patut kalaksanayang kadi ring sor :

- 1) Nganutin Dewasa, saha tan kalugra mendem :
 1. Rikala Purnama/Tilem, Kajang Kliwon, Sukra Paing/Saniscara Pon Wuku Dungulan, Karyan ring Desa, Candung watang, rerahinan ageng manut ring pararem.
 2. Makirim bangke
 3. Piodalan /pauman ring Khayangan Desa utawi panyejeran Ida Bhatara rikala Melis/Melasti
- 2) Nganutin genah, inggih punika :
 1. Ring setra rare, pamendeman wong rare sane during ketus untu.
 2. Ring Setra ageng, genah pamendeman jadma ngawit yusa sampun ketus untu ngunggahang.
- 3) Kalugrayang mendem manut paetangan :
 1. Anak alit durung tumbuh untu patut kapendem pramangke tan nyantos dewasa.
 2. Pamendeman rikala piodalan sane kabawos galah dadi, patut amandung tan pasuara, mamargi saha tan maupakara pramangke.
- 4) Ring setra tan kalugrayang makarya undung-undung gumanti (kuburan) sakewanten kengin mapinget asiku bangun pracinha panamaya mwah parab sang lampus.
- 5) Prade wenten krama tios Desa mendem, kakanin panukun setra gung arta 1700 wijinan jinah bolong saha upakara sajangkepnia.

Pawos 17

- 1) Prade lampus sangkaning salah/ulah pati lan kapengawan, kengin kabakta budal tur kaprateka kadi patut, risampun kamanggala antuk banten panebusan lan pangulapan.
- 2) Prade wenten sinalih tunggil krama ngerobang warga keni gering tan wenang sambat, gering agung, lan siosan punika sadereng lampus patut digelis kasadokang ring prajuru miwah kapratiba-jampi pangusaha Dokter, prade mamurug sang ngerobang kadanda manut pararem saha rikepatiwong gering inucap tan polih pangeroban mwah suaran kulikul.
- 3) Prade sang istri lampus ngadut manik tan wenang pendem sadereng bobotane embas.
- 4) Prade kahanan wong lampus ring pakarangan, tegal, tepi siring, segara, lan siosan punika, tan keni antuk ngelingin patut masadok ring sang mawangrat.

Pawos 18

- 1) Mungging kacuntukan kadi ring sor :
 1. Sakeng ubanjaran, salami tigang rahina :
 - ha. Prade kapendem/ngaben pramangke, ngawit saking lampus ngantos tigang rahina sakeng pangutangan (palebur buntas)
 - na. Prade atiwa-atiwa nyeka (ngerit), ngawit sakeng ngulapin ngantos tigang rahina sakeng pangutangan pangutangan (palebur buntas)
 2. Sang madruwe lampus :
 - ha. Durung kepus udel abulan pitung rahina (42 rahina)
 - na. Risampun kepus udel ngunggahang, masue roras rahina.
 3. Saking sulur kilitan pakulawargan, tunggal pamerajan ageng, lan siosan punika, masue jantos makelud.
- 2) Tan keneng cuntaka luire :
 1. Sang sulinggih lan Pamangku Kahyangan Desa.
 2. Rikala ngwangun yadnya ring Kahyangan Desa risampun galah dadi.

Pawos 19

- 1) Atiwa-tiwa (pangabenan) wenten kalih pamarginia :
 1. Nyawa resi utawi nyuasta geni.
 2. Sawa prateka.
- 2) Nyawa resi kamargiang antuk pangawak dawning tan ngagah utawi menawi galihe tan kekeniang.
- 3) Sawa prateka kamargiang antuk ngagah galih utawi mrateka sawa bah bangun.
- 4) Dudonan pangabenan kadi ring sor :
 1. Ngaskara antuk ngagah utawi nyawa resi.
 2. Pangutangan antuk ngeseng sawa.
 3. Pakiriman.
 4. Nyekah/mamukur/ngrorasin.

Pawos 20

- 1) Panomayan pangabenan nyeka utawi ngerit kamargiang manut pararem.
- 2) Tata sulur pangabenan anut papendem ring ajeng maweweh kadi ring sor :

1. Beya panukun setra katur ka Dalem Kahyangan, luire jinah bolong 250 wijian, beras acangkop, kelapa/lan adeng sawungkul, benang arence, beras aprepatan, bebek kakalih luh muani, prade ngabenang sawa adiri.
2. Nunas tirta ring Kahyangan Tiga : gung arta 250 wijinan jinah bolong, beras acangkop, kelapa sawungkul, benang arence mwah segan alit asiki, prade ngetangang sawa adiri.

Palet 4

Indik Manusa Yadnya

Pawos 21.

- 1) Manusa Yadnya inggih punika upacara-upacara dharmaning manusa, ngawit sakeng patemoning karna petak lan kama bang sajeroning garba (waduk) ibiyang ngantos lampus riwekas.
- 2) Upacara-upacara kadi ajeng madudonan sakadi ring sor :
 1. Magedong-gedongan duk pangerempinian ibiyang
 2. Duk sang kama reka/rare wawu embas.
 3. Kepus udel utawi puser.
 4. Nglepas aon utawi risampun rare mayusa roras rahina.
 5. Tugtug kambuhan risampune rare mayusa 42 rahina.
 6. Tigang sasih (asambutan)
 7. Paweton/odalan risampune rare tutug nem sasih nerus nemu gelang.
 8. Ngempugin rikala wawu tumbuh untu.
 9. Tutug kelih , ngraja wadone lan ngembakin lanange.
 10. Matatah/mapandes.
 11. Pawiwahan.
 12. Mawinten/ekajati, lan siosan punika.
- 3) Upacara-upacara inucap nista, madia, utama, nganutin sastra agama mwah drestsa ngawinayang sima cara Desa Adat Tuban.
- 4) Upacara pawintenan anut sakadi pawos 12 prade pacing ngenterang yadnya utawi manut dresta prade pawintenan ngraga, mwah upacara pawiwahan anut pawos 26 (1) ring sor.

Palet 5

Indik Bhuta Yadnya

Pawos 22

- 1) Bhuta Yadnya ingih punika upacara-upacara pabeyakalan ring pratiwi lan kahyangan mwah sarwa prani saha bebhutan.

- 2) Upacara pabeyakalan ring sarwa prani, luire :
 1. Ring sarwa tumuwuh, rikala Tumpek Wariga.
 2. Ring sarwa ingon-ingon, rikala Tumpek Uye.
 3. Ring sarwa senjata, makamiwah sakaluring prabot-prabot pakaryan, rikala Tumpek Landep
 4. Ring sarwa tetabuhan utawi kasenian, rikala Tumpek Wayang
 5. Upacara pakalan-kalan manusa manut wiguna, ketah kabawos pabeyakala
- 3) Upacara-upacara pabeyakala ring pratiwi muwah Kahyangan lan ring bebhutan kabawos macaru, sane kamargiang nista, madia, utama, mnut wiguna, luire :
 1. Ekasata, antuk ayam brumbun asiki
 2. Pancasata, antuk ayam lalima
 3. Pancasanak
 4. Tawur kasanga
 5. Panca Kelud/Balik Sumpah , antuk kebo miwah kambing
 6. Resigana, antuk bebek blangkalung, miwah asu
- 4) Sajawaning ring ajeng kawentenang Yadnya Sesa (Mesaiban, Majot-jotan) nyabran wusan ngratengan

Pawos 23

Upacara tawur kasanga rikalaning Tilem kasanga :

- 1) Majeng ring Ida Bhatara Kahyangan Desa :
 1. Pangelong ping 13 melasti ka Segara, kairing antuk para sanak sawidangan Desa Adat Tuban, prade krama Desa Adat Tuban tan ngiring kadanda antuk banjarnia soang-soang manut pararem
 2. Upakara ring Segara kaetangan antuk Prajuru Desa sane kaampok antuk banjar manut dresta
 3. Ring pangelong ring 14 nyejerang Ida Bhatara ring Bale Agung
- 2) Upakara tawur manut sakadi ring sor :
 1. Pacaruan kawentenang manut genah
 2. Nyoreang kawentenang Pangrupukan
- 3) Tan kalugra malila-lilayan antuk geni mwah ngrupuk jantos langkung tengah wengi, reh rahina inucap sampun nampih rahina sipeng benjange

Pawos 24

- 1) Upakara Rahina Nyepi/Sipeng patut kamargiang catur prabatan :

1. Amatu Geni sajawaning :
 - ha. Madruwe rare during tigang sasih ring genah rare inucap
 - na. Matepetin, ring genah sang sungkan
 - ca. Madruwe layon ring genah sawa inucap
 2. Amati Karya tan kengin anyambut gawe, sajawaning pacalang Desa lan Prajuru Dinas, miwah Sang polih uak-uakan (izin) antuk ilikita pastika sakeng Sang Mawangrat.
 3. Amati Lampah, tan kengin melelungayan
 4. Amati lelungan, tan kengin maswara gora, maoneg-onengan (mapalalian), lan siosan punika
- 2) Prade wenten Krama mamurug brata panyepian kadanda manut pararem
 - 3) Riwus rahina Nyepi kawastanin Ngembak Geni, mapiteges panglukaran yoga semadi kadulurin antuk pangaksama, soang-soang Krama Desa/Banjar ring Tuban, macihna pangawit Icaka Warsa

SARGA IV

SUKERTA TATA PAWONGAN

Palet 1

Indik Krama

Pawos 25

- 1) Sane Kabawos Krama Desa Adat Tuban inggih punika kaluwarga Agama Hindu sane sampun mabanjar Suka-Duka tur nyungsung Kahyangan Tiga Desa Adat Tuban
- 2) Sajaba punika kabawos tamiu

Pawos 26

Krama Desa Adat Tuban wenten kalih soroh, luire:

- 1) Krama ngarep, kaluwarga sane sampun mawiwahan tur sampun tedun makrama Banjar Suka-Duka
- 2) Krama balu, salah sinunggil kaluwarga krama ngarep lampus utawi nyapin

Pawos 27

Kawit dados krama Desa Adat Tuban wenten tigang soroh luire:

- 1) Wit sangkaning sampun jumenek ring Desa Adat Tuban
- 2) Mawiwit ngrereh pangupajiwa sawidangan Desa Adat Tuban, wit matilar saking rahayu ring Desa Sewosan
- 3) Malarapan antuk pawiwahan pratisentana wiwit (1) miwah (2) ring ajeng, manut tata cara Agama Hindu

Pawos 28

Panemayan tedun makrama Desa Adat Tuban:

- 1) Malarapan pawiwahan utawi ngrereh pangupajiwa utawi patilar saking rahayu ring Desa sewosan risampun katedung makrama Banjar Suka-Duka
- 2) Ngranjing mabanjar Suka-Duka kamargiang :
 1. Enem sasih saking pawiwahan
 2. Asasih saking patiler rahayu ring Desa sewosan, kadulurin antuk supeksa pailikitan ring prajuru Banjar Suka-Duka
- 3) Soang-soang kulawarga pacing tedun makrama Desa Adat patut:
 1. Sanggup nyiwi Kahyangan Tiga Desa Adat Tuban
 2. Tinut saturut ring daging awig-awig, pasuruan lan pararem Desa Adat Tuban, nawur pamogpog 225 (satak slae) jinah bolong saha upakara daksina pajati ka Pura Desa/Bale Agung

Pawos 29

Sahanan warga Desa Adat Tuban sami keni ayah-ayahan, luire:

- 1) Ayah ngarep sakeng krama ngarep
- 2) Ayah balu sakeng krama balu
- 3) Ayah lemetenan sakeng dandanan waris (1) miwah (2) ring ajeng, sane sampun manggeh deha-teruna tur kapupulang dados sekaa teruna-teruni (deha-teruna)

Pawos 30

Tetegenan krama Desa Adat sakadi ring sor:

- 1) Krama ngarep keni ayah miwah pepeson mamungkul
- 2) Krama balu keni pepeson mamungkul miwah ayah nyibakin

- 3) Banjar Suka-Duka utawi pangampok keni tetegenan manut wiguna, reh Banjar inucap maka tangan sukuning Desa Adat Tuban

Pawos 31

- 1) Prade wenten pakaryan abot sane patut karombo, kengin karombo antuk soang-soang Krama Desa Adat, utawi nganggen undagi, turmaning prabeya kaetang antuk soang-soang Banjar Suka-Duka
- 2) Prade wenten sinalih tunggil/salah ninunggil Krama Banjar tan satinut ngrombo pakaryan Desa Adat, wenang i Banjar Suka-Duka ngenanin pamidanda manut pararem

Pawos 32

Swadharmaning Krama Desa sewosan ayah-ayah, luire:

- 1) Krama Desa/Banjar patut:
 1. Dreda atuang ring Desa
 2. Tinut saturut ring sadaging awig-awig, pasuaran lan pararem Desa
 3. Tan maren ngutsahang mangda Desane prasidha nyujur anut patitis
- 2) Swadharmaning Tamiu:
 1. Tinut saturut ring sapa margin kartin Desane

Pawos 33

Patias utawi ulih-ulihan Krama Desa kadi ring sor :

- 1) Polih pasayuban prajuru ngamanggehang lui patitis tur kabawosin saha katiwakin pamutus sahanan wicarania
- 2) Nyarengin paruman Desa/Banjar, saha wenang mastikayang pamutus
- 3) Kengin manut paetangun luire:
 1. Mapuankid, ngluputin ayah-ayahan Desa/Banjar, menawita : mapawangunan, mayadnya, matepetin miwah kaluasan mawaneng awuku
 2. Nyada, ngamademang ayah-ayahan riantukan sampun wenten panyade utawi sampun wenten mayusa 60 warsa wiadin pinunas ngrage manawi kasungkunan
 3. Nyuksukin utawi nyledihinin ayah-ayahan, tur sane kadadosang risampun manggeh deha-teruna, prade mamurung kadanda manut pararem
 4. Mogpog, ngetut ayah saha pepeson antuk arta bhrana dawning kaluasan

5. Ngewot (meli ayah), ngentos ayah saha pepeson antuk arta bhrana dawning kaluasan paling kidik nem sasih utawi panemaya ring hotel (makarya ring pemerintah), manut pararem
6. Luput, tan keni pepeson utawi ayah-ayahan riantukan dados prajuru lan siosan punika

Pawos 34

Wusan dados Krama Desa sakadi ring sor :

- 1) Sangkaning magingsir genah wewidangan Desa Adat Tuban, kadulurin antuk nunas panugrahan ilikita prajuru
- 2) Kanorayang (kawusang) antuk Banjarnia utawi Desa manut tata cara
- 3) Sang wusan makrama tan polih pah-pahan sangkaning druwen Desa/Banjar utawi ninggal sesana

Palet 2

Indik Prajuru

Pawos 35

- 1) Desa Adat Tuban kaenter antuk Bandesa Adat (Kelihan Desa Adat)
- 2) Banjar kaenter antuk Kelihan Suka-Duka
- 3) Bandesa Adat lan Kelihan Suka-Duka :
 1. Mawiwit sakeng Krama ngarep
 2. Kaadegang malarapan antuk pamilihan parumania soang-soang, nyabran limang warsa, sajawaning wenten parindikan tios tur dados kapilih malih
 3. Maduluran nunas panugrahan ring Pura Kahyangan Tiga Desa Adat Tuban

Pawos 36

- 1) Bandesa Adat/Kelihan Desa kasanggra olih prajuru-prajuru minakadi:
 1. Pangliman Desa maka wakilnia
 2. Panyarikan pinaka juru surt (ilikita)
 3. Patengen pinaka pangemong druwen Desa
 4. Kasinoman pinaka prajuru Banjar soang-soang
- 2) Dudonan panyanggrane manut abot dangan pakaryane makadi kasinoman pakaryane magilir manut paetangan Banjar soang-soang
 1. Sajeroning ngenterang pasukertan niskala Kelihan Desa masinggihang Pamangku Kahyangan Tiga Desa

Pawos 37

Tata cara mamilih Prajuru Desa :

- 1) Ngawentenang Panitia sane kapilih oleh Krama Desa
- 2) Banjar saong-soang ngamedalin calon prajuru sajangkepnyane
- 3) Panitia kinucap sane kasukserahin wewenang, mamilih calon prajuru sane sampun kasudi olih Panitia kasiarang ring Paruman Desa kapungkur, indik sang ngamolihang kasudi antuk kaputusan Krama Desane sami

Pawos 38

- 1) Swadharmaning Kelihan Desa/Bandesa Adat luire :
 1. Ngenterang palaksanaan sadaging awig-awig, pasuara lan pararem-pararem Desa
 2. Nuntun tur ngeterang Krama rauhin warga Desa ngupadi anut patitis
 3. Mawosang kalih niwakang pamutus arep ring wicaran warga Desa
 4. Maka Duta Desa matemuang bawos ring sapa sira ugi
- 2) Prade Prajuru nilar sesana, keni pamidanda nikel ring kaiwangan soang-soang Krama, saha kaangkat karariang manut pararem

Pawos 39

Patias (olih-olih) Prajuru Desa Adat luire :

- 1) Luput ayah miwah pepeson
- 2) Pikolih tiosan manut pararem

Pawos 40

- 1) Prajuru kagentosin riantukan :
 1. Seda (lampus)
 2. Pinunas ngraga wit rahayu, ring Paruman Desa Adat
- 2) Ngentosin Prajuru Desa patut kararemin antuk Krama Desa sajeroning paparuman (pasamuan)

Palet 3
Indik Pasumuan
Pawos 41

- 1) Pasamuan/pasangkepan ring Desa Adat Tuban luire :
 1. Pasamuan Desa/Banjar, nganut panemaya utawi padgata kala :
 - ha. Pasamuan Desa nyabran 6 sasih utawi padgata kala
 - na. Pasamuan Banjar ngasasih apisan utawi padgata kala
 2. Sangkepan Prajuru kawentenang manut wiguna
 3. Sangkepan Sekaa-sekaa manut wiguna
- 2) Pasamuan Desa/Banjar madudonan sakadi ring sor :
 1. Kaduluran pangarah, prade padgata kala, salanturnia maka cihna suaran kulkul manut pawos 46 angka 3
 2. Prasida lumaksana risampun katedunin antuk sang patut ngamiletin, mabusane nylempot saha tan kalugra makta gegawan sakaluire
 3. Tan maren ngarcana Idha Bhagawan Panyarikan maka sarana cane
 4. Pangawit kalaksanayang panyacak- sep-sepan saha riwusnia nyacak dedosan agung alit manut pararem soang-soang Banjar Suka-Duka
 5. Pamutus bawos gili saguluk (pararem) punika kamanggehang
- 3) Prade pidaginh pasamuan tan kararemin, mangda Prajuru ngilikang bebawos tur ngwaliang malih ring pasamuan pacing kasungkemin, bilih tan prasida taler ngamanggehang pararem wenang prajuru nunas bawos ring Parisada miwah Kantor Agama, mawastu daging pasamuan inucap wicara ring Desa

Pawos 42

- 1) Sajeroning pasamuan Banjar/Desa patut kasiarang :
 1. Munjuk lungsuring pakraman, makadi : ayah-ayah, sulur arta bhrana, lan siosan punika
 2. Rencana Prajuru nganinin usaha Kapungkur
- 2) Sahanan kasiarang ring ajeng katitenin saha katiwakin pamulus antuk pasamuan soang-soang
- 3) Pamutus pasamuan Desa/Banjar sinaggeh pararem maka pamitegep palaksana awig-awig

Pawos 43

- 1) Sangkepan Prajuru patut :
 1. Kawentenang sanistane tigang sasih apisan, bilih-bilih kengin ngasasih manut wiguna

2. Kasarengin antuk sahanan Prajuru Desa lan Kelihan- Kelihan Suka-Duka
3. Katuntun antuk Kelihan Desa/Bandes Adat
- 2) Sangkepan Prajuru kawenang wantah ngrincikang Tata upaya nglaksanayang usaha miwah pangrencana sakaluire
- 3) Pamutus sahanan rerancangan, bilih-bilih rencana pacing niwakin tetegenan i krama, tan kpatut sadereng kapikukuh antuk pasamuan Desa/Banjar anut dudonan
- 4) Pamutus pasangkepan Prajuru mawiwit pituduh Sang Mawangrat utawi ngonekang pecak pararem i krama sinanggeh pasuara Desa Adat Tuban

Pawos 44

- 1) Pasangkepan sekaa-sekaa kawentenang manut wiguna
- 2) Nangken pasangkepan sekaa patut atur supeksa riyin ring Prajuru Desa/Banjar prasida tan lempas kadi patitis pawos 3 ring ajeng

Palet 4

Indik Dusta Bhaya

Pawos 45

- 1) Indik Bhaya kaucap panca-bhaya luire :
 1. Jiwa bhaya, makadi kepet patinia, kabaak/karampok, kakaninin, lan siosan punika
 2. Artha bhaya utawi kapandangan/kamalingan
 3. Geni bhaya utawi kapuunan, upami umah puun
 4. Er bhaya utawi kablabaran, anyudang embah, bayu ageng, lindu
 5. Dura cara ring agama
- 2) Sang manggihin sahanan jiwa bhaya patut nepak kulkul mapitulung manut pawos 46 angka 3 tur sang mayanin keni prabaye katibajampi saha panyangaskara pangulapan
- 3) Prade kacunduk artha bhaya, patut ngulkul anut pawos 46 angka 3, utawi sang kamalingan atur supeksa ring prajuru sane pacing nimbangin saha niwakang pamutus ring dustane :
 1. Sajawaning numasang ring Polisi, taler nganinin pamidanda mangda mangda manut pararem Desa saha ngwaliang wit
 2. Pamidanda nikel prade teer mamaling lintangan ring apisan
 3. Maweweh panyangaskara prade mamaling barang sinanggeh suci
- 4) Prade wenten manggihin katunuan utawi kablabaran/anyudang embah patut ngulkul anut pawos ring ajeng, katedunin antuk sahanan ayahan saha gegawan mapitulung anut rupan bhayane

- 5) Prade wenten sinalih tunggil krama katunuan, kablabaran, bayu ageng, lindu, patut krama matulung ngaryanang kubon tetanceban
- 6) Sang Dura cara ring Agama prade macihna anut tri premana, wenang jadma punika kadanda manut pararem saha panyangaskara

Palet 5

Indik Kukul

Pawos 46

- 1) Kukul ring Desa Adat Tuban wenten tigang soroh :
 1. Kukul Desa magenah ring Pura Desa/Bale Agung
 2. Kukul Banjar Suka-Duka ring soang-soang Banjar
 3. Kukul Sekaa manut wiguna
- 2) Suaran kukul punika kabawosang pasuaran iwadesa wiadin i krama Banjar
- 3) Tabuh tatepakan kukul inucap pastika masewosan manut tatujon luire :
 1. Tangerang tedun ngayah utawi pasamuhan, kukul masuara 4(petang) tulud
 2. Tengerang Wali, kukul masuara nguntit, ngawit puja stawan sira Mangku/Sang Sulinggih
 3. Tangerang kapanca-bhaya :
 - 3.1 Jiwabahaya upami kabaak/karampok/arthabhaya, pangamuk, kukul masuara bulus nungkak makudang palet
 - 3.2 Genibahaya upami umah punun, blabar, kukul masuara bulus nglantur sawetara akenyelan, utawi sakantun geni kapanggih murub taler pateh indik blabar
 - 3.3 Tangerang sinalih tunggil warga Desa/Banjar wenten lampus kukul masuara 3(tigang) tulud sake wenten pamuput nungkak

Pawos 47

- 1) Kukul Desa/Banjar tan wenang katepak yan tan sangkaning pituduh prajuru, sajawaning tangeran kapanca-bhaya
- 2) Sang nepak tan sangkaning pituduh, patut digelis atur supeksa maka buatan panepake, yan tan mangkana kadanda manut pararem, asapunika taler pamidandane yan itan nganutin wiguna
- 3) Sahanan kukul Banjar sawidangan Desa Adat Tuban, patut katepak, prade wenten sinalih tunggil kukul Banjar nerangang suara kapanca-bhaya, prade Banjar sane sewosan nenten sareng nyawurin, patut Banjar inucap kaglemekin antuk Prajuru Desa

- 4) Tengeran kapanca-bhaya patut katedunin antuk sahanan ayahana saha gegawan manut rupan bhayane
- 5) Kulkul sekaa tan wenang nyawurin sukat miwah tengerin kulkul Desa/Banjar, prade mamurung kadanda manut pararem

Palet 6

Indik Wicara

Pawos 48

- 1) Sane wenang mawosin makadi mutusang wicara ring Desa luire :
 1. Kelihan Suka-Duka prade sang mawicara patunggalan bebanjaran
 2. Bandesa Adat/Kelihan Desa prade sang mawicara mabinaya bebanjaran
- 2) Prade sang mawicara tan wenten cumpu ring tata cara Kelihan Suka-Duka mawosin kengin nunas bebandingan ring Prajuru Desa, Bandesa Adat/Kelihan Desa
- 3) Taler tan wenten cumpu ring panepas Bandesa Adat/Kelihan Desa, kengin nunasang wicara inucap ring Sang Rumawos

Pawos 49

- 1) Wicara sane mawiwit kacorahan sakaluire miwah sinanggeh nungkasin daging awig-awig, pasuruan lan pararem, patut pramangke kabawosin tan nyantos pasadok
- 2) Sajaba wicara kadi ajeng patut nyantos sang nunas bawos
- 3) Panepas patut pastika nyantenang iwang patut malarapan tri pramana (saksi, ilikita, bukti) muwah tan maren nepel ring catur dresta lan agama

Palet 7

Indik Pamidanda

Pawos 50

- 1) Desa utawi Banjar wenang niwakang pamidanda ring wong Desane sane sisip
- 2) Tetiwak inucap kalaksanayang olih Kelihan Desa/Bandesa Adat utawi Kelihan Banjar nunggal-nunggal manut dudonan
- 3) Bacakan Pamidanda luirnia :
 1. Ayahana Panukun kasisipan
 2. Danda Artha

3. Panikel-panikel urunan utawi panikel dedendan
4. Upakara panyangaskara
5. Kanorayang/kawusan makrama ajebos (skorsing)

Pawos 51

- 1) Pamidanda katiwang patut manut ring awig-awig, pasuara, pararem, utawi dresta miwah agama miwah adung ring kasisipania
- 2) Agung alit pamidanda sane katiwakang masor singgih manut ring kasisipania

Pawos 52

Jinah utawi Raja bhrana pamidanda ngranjing dados druwen Banjar utawi Desa manut dudonan

Palet 8

Indik Panyangran Banjar

Pawos 53

- 1) Pakaryan druwen sinalih tunggil krama sane mabuat, tata panyanggranya kasukserah ring Banjar soang-soang
- 2) Banjare wenang ngardi awig-awig ngamanggehang tata carane nyanggra pakaryan kramane munggah ring ajeng
- 3) Daging awig-awig patut madasar antuk arsa parama tulung ring sang makarya nanging tan maren miteketang kasusatyany kramane ring Banjar miwah Desa
- 4) Bilih karyane dahat, bobot Banjare wenang ngruruh penampih ring Banjar sewosan

Pawos 54

- 1) Pakaryan sane patut kasukserah ring panyanggran Banjar, luire :
 1. Ngupakara sawa
 2. Sahanan pengabenan yadiastun tanpa sawa
 3. Miwah pakaryan-pakaryan sewosan manut ring awig-awig Banjare (upami ngisidang umah, ngraabin umah, lan siosan punika)
- 2) Sajaba kadi inucap ring ajeng, pakaryan-pakaryan ring sor puniki taler kengin katunasang panyanggran Banjar, luiripun:
 1. Sahanan Yadnya

2. Ngisidang sakeluir tetangunan (Bale, Pawon, Jineng, lan siosan punika)

Pawos 55

- 1) Awig-awig Banjare ring ajeng, tan kening kalaksanayang sadurung kacecirenin antuk Kelihan Desa/Bandes Adat
- 2) Daging awig-awig inucap patut tan maren ngadungang mungging wibuh kancit pakaryane ring agung alit panyambaman ring Banjar

Palet 9

Indik Pawiwahan

Pawos 56

- 1) Pawiwahan inggih punika patemoning purusa lam predana malarapan panunggal kayun sukacita kadulurin upasaksi sakala lawan niskala
- 2) Palaksanaan pawiwahan ring Desa Adat Tuban luire :
 1. Papadikan, kamanggala antuk pakrunan
 2. Mrangkat/ngrorod, mamargi riyin wawu kakrunayang
 3. Nyeburin utawi nyentana (risampun kalaksanayang antuk upakara pamerasan, pajati/jauman)
- 3) Pidabdab sang pacing mawiwahan patut :
 1. Sampun manggeh daha-teruna
 2. Sangkaning pad arena (tan papaksan)
 3. Manut kecaping agama (tan gamia gemana)
- 4) Pamargin parabian inucap ring ajeng mangda taler nganutin uger-uger pawiwahan Negarane (Undang-undang Perkawinan) inggih punika : UU No.1 warsa 1974 saha PP No.9 warsa 1975, miwah pasuare sane kemedalang antuk Gubernur Kepala Daerah Provinsi Bali
- 5) Prade mamurug kecaping angka (3) ring ajeng macihna Tri Premana patut :
 1. Pangantene kengin kapalasang saha kadanda manut pararem prade kapaksa, asapunika taler ane ngeromin miwah nyarengin mlegandang
 2. Pangantene patut kapalasang saha pamidanda ngupakara Desa prade wenten agamia ring nyama, ring ipianak ngrupaka utawi katuminan lan agamia sewosan manut dresta

Pawos 57

- 1) Pawiwahan sane kapatut ring Desa Adat Tuban pawos 56 (1) risampun :
 1. Mawidi-widana, sanistane pabiyakalan
 2. Kasaksinin antuk Prajuru Desa lan Dinas
 3. Kaungguhan sajeroning pailikitan tur katumusang ring Sang ngawe wenang
 4. Nawur prabeya upasaksi pawiwahan masarana daksina masesari 225 jinah bolong
- 2) Parabian kabawos tan patut prade :
 1. Natab upakara saking papaksan
 2. Sinalih tunggil tan rawuh
 3. Nenten saksi miwah ilikita

Pawos 58

Tata caraning parabian patut sakadi ring sor :

- 1) Sapasira ugi ngwarangang pakulawargan patut masadok ring Prajuru salantur kaparitas manut tan manut kecap parabiane
- 2) Prade mamadik pamargine manut dudonan :
 1. Pakrunan patut ping tiga sane saong-soang malarapan :
 - ha. Pertama antuk ngidih (masuaka)
 - na. Pangambilan
 - ca. Majauman
 2. Risampun patut babawosan sang wadon kaajak budal ring pakuwuban sang lanang saha kalanturang antuk pabiyakalan
 3. Mangda tumus, patut kapikuren sakala niskala, raris kamargiang upakara nelok antuk kulawarga purusa maduluran pajati katur ring mrajan wadone
- 3) Prade mrangkat (ngrorod) patut :
 1. Reraman lanange ngwentenang pamilaku/pajati antuk duta, sakirangnia kalih adiri, saha tan kengin kasepan ring arahin maka sarana dammar
 2. Dados pagenahan antene dura Desa prade pangambile sajeroning Desa Tuban utawi dura pakubon prade pangambile tios Desa Tuban
 3. Mawaneng tigang rahina kawentenang panglukuan manut tata cara :
 - ha. Kamanggala antuk geng pangampura, marep ring rerame wadone
 - na. Kaigumang bawos idih pakidih utawi palegeyang arep ring pasuakan sang ngluku saha dewasa pakerab-kambene riwekas
 - ca. Kacihnayang antuk kapurusan utawi prade sentana rajeg kajejerang kapatut ngidih anak lanang sane kabawos pawiwahan nyeburin, tur risampun sulur pamerasan kategepin kamanggehang sentana nyeburin

- 4) Teges pakerab-kambene upakara tinas apadang mapikuren, dwaning:
 1. Sajeroning kabawos ambe, kamargiang sakala antuk serana jejauman saha niskala antuk Widi Widana pajati, pinaka nunas wadone ring merajan kamulania ketah bawose ring Desa Adat Tuban Nelok
 2. Bawos kerab palaksana wantah ring sakala antuk panyaksi krama Banjar/Desa, pamekas saksi Prajuru tur ngilikita ring genah kapurusan

Pawos 59

- 1) Piteges pawiwahan patut sang lanang marabi adiri taler sawaliknia sajawaning wenten pasubaya tios
- 2) Prade wenten lokika sanggraha :
 1. Sang mobotang patut nyakapang sang wadon, prade tan anut nyakapang, danda 500 jinah bolong saha manyangaskara pangrebuan ring Pura Desa, kaduluran ngupakara bobotania jantos ngupajiwain rarene riwekas
 2. Prade tan wenten sang ngangken malaksana bobotan, patut kaluwargan wadone ngrebu ring Pura Desa tur ngupakara sang bobot ngantos tan mawastu rare sane kabawos bebinjat
- 3) Prade wenten ngeker anak istri, mamitra ngalang, lan siosan punika mawastu jadma inucap kabawos mekelin Banjar, patut jadma inucap mawiwaha yan tan anut keni panyapsap samara dudu, geng arta 1000 jinah bolong saha wusang malaksana kadi ajeng, prade kapurug pamidanda nikel, taler tan anut nawur tan pulih suaran kulkul asing-asing makarya suka-duka kaluwargan jadma inucap, pamidanda ring unkur taler kapurug mawaneng kaling pasangkepan wenang krama inucap kawusan makrama Banjar/Desa asapunika taler dudonan pamidanda manut angka (3) ring ajeng
- 4) Prade wenten drati krama utawi para dara, lan siosan punika sane ngawinayang cemar Desa Adat Tuban, kakenain pamidanda manut angka (3) ring ajeng

Palet 10

Indik Nyapian

Pawos 60

- 1) Pawiwahan prasida kawusang malarapan antuk palas parabian utawi padem
- 2) Wusan makuren saantukan salah sinunggil lampus, mapiteges balu
- 3) Palas parabian wenten sangkanin utawi mawiwit wicara pracihna tan tumus suka citaning tunggaling idep sang alaki-rabi, kabawos nyapin

- 4) Sang ayat palas marabian patut tur supeksa pailikitan ring sang rumawos (Pengadilan Negeri) wastu tinas apadang pamutuse kabawos nyapin, nglantur Prajuru nyarwakang kawentenania ring wewidangan Desa saha masamsam ring Bale Agung

Pawos 61

Tata caraning palas marabian :

- 1) Sulus palas marabian, prade sinalih tunggil : anasar laku, cedangga, wirasaning laku, matilar tan pasadok lan siosan punika, miwah setata wakparisia tan sida adung malih
- 2) Prade wicara katumasang antuk lanange, makacihna :
 1. Istri paradara (anasar laku)
 2. Amandek sanggama (maambul-ambulan) jantos nem sasih
 3. Cedangga tan prasida nyanggamin
- 3) Prade wicara katumasang antuk istrine, makacihna :
 1. Lanang drati krama (mamitra)
 2. Tan ngupajiwen jantos nem sasih
 3. Wandu (cendangga)
- 4) Prade manut ti pramana sang mawicara inucap (2) miwah angka (3) :
 1. Parabian kengin kapalasang
 2. Katiwakin pamidanda manut pawos 59 (4)
- 5) Prade palas parabian sakeng pada lila patut :
 1. Nawur prabiya manut pawos 59 (4)
 2. Pagunakayan polih pahan pada
 3. Pabekel/tatadan kuasa niri-niri sakewenten warisan kuasa antuk purusa
 4. Ngaweruhin miwah pangupajiwen pretisentana manut sawadharmaning Guru Rupaka
- 6) Pamidanda panyapian inucap ring ajeng kengin kamargiang risampun katiwakang pamutus antuk sang rumawos pawos 59 (4)

Pawos 62

- 1) Prade riwekas sang palas kacihnayang adung malih, patut :
 1. Nglaksananyang pawiwahan malih manut pawos (56) 1
 2. Keni pamidanda nikel sakeng palase, yadiastun wit palase pecak sakeng pad alas carya

Pawos 63

- 1) Soang-soang balu kabinayang dados:
 1. Balu luh wit sentana (sentana rajeg) muwah, balu luh boya sentana

2. Balu muani kapurusa muwah balu muani nyeburin
- 2) Swadharmaning balu inucap patut :
1. Ngamanggeham pati brata, tan kengin ngamargiang para data/drati krama
 2. Ngewasayang warisan, pagunakayan somahniapecak tan kengin ngadol, makidihan, lan siosan punika sajawaning kabebasan sakeng pianak utawi pakulawargan pinih nampek sakeng rabi
 3. Kengin ngidih sentana, prade wenten pidabdaba sadurung sinalih tunggil lampus, saha kabebasan antuk kulawargan sinanggih kapurusan
 4. Kawenangang mawiwaha malih, prade sampun polih paigum sakeng oka daha truna utawi kulawargan kapuruse tur prasida ngupajiwèn sentanania

Pawos 64

- 1) Bulu inucap tan pageh, luire :
 1. Drati krama / para dara
 2. Matilar sakeng pakubon tan pasadok jantos nemsasih
 3. Lempas ring swadharmaning balu, tan prasida ngehehin solah maprawerti marep pitutuh kulawargan kapurusan
- 2) Prade manutt tri premana, wenang balu inucap inggihan balu luh boya sentana utawi balu muani nyeburin (boya sentana) :
 1. Antuk pianak utawi kulawargan kapurusan
 2. Tan polih upon waris
- 3) Prade balu inucap pageh katundung kulawargan kengin padum pagunakayania

Palet 11

Indik Sentana

Pawos 65

- 1) Sentana wenten kalih pawos sane kaucap pratisentana miwah sentana paperasan
- 2) Pratisentana, inggih punika sentana sane medal sakeng pawiwahan
- 3) Prade parabian tan kapatut ngawentenang sentana, mangda tan kabawos astra/bebinjat yoga kamanggala antuk upakara sesayut panyampi tur kalanturang antuk pawiwahan
- 4) Prade pawiwahan tan ngawetuang sentana kengin ngidih sentanan antuk upasaksi sakala niskala, sane kabawos sentana paperasan

Pawos 66

- 1) Ngangkat sentana manut dudonan makacihna manut kedeh pikayun tur sampuningkup ring kulawargania, kalantur antuk pamerasan saha kasinaksian sakala niskala
- 2) Sapa sira ugi pacing ngedih sentana patut masadok ring prajuru asasih sadurung panemaya pamersan
- 3) Bandesa Adat/Kelihan Desa kaselidihi antuk Kelihan Suka Duka patut nyarwakang ring sawidangan Desane, sapisire rumasa tan lila mangda nyadokang wasengker kalih wuku sadereng kalaksanayang pamerasan punika ring Bandesa Adat/Kelihan Desa Adat
- 4) Bandesa Adat digelis mawosan saha ngicenin pamutus anut ring catur dresta miwah pararem Desa
- 5) Prade sulur paperasan tan manut ring kecaping ajeng, prajuru wenang ngandeg sang pacing makarya, saha ngicenin panuntun mangda pangrencana paperasan punika pastika manut sulur miwah wicarania

Pawos 67

- 1) Paperasan sane patut ring Desa Adat Tuban risampun makacihna :
 1. Widhi-widana paperasan
 2. Kasaksinin antuk prajuru Desa Adat lan Dinas raris kasiarang ring Desa/Banjar
 3. Wenten ilikita ungguhan tata sulur pamargian paperasane
 4. Patut katumasang pamaritatas ring Guru Wisesa/Pengadilan Negeri
- 2) Sane patut anggen sentana :
 1. Jadma magama Hindu
 2. Papernahan nedunang sakeng sang meras
- 3) Kulawarga sakeng purusa, prade tan wenten kengin sakeng wadon, bilih taler tan wenten wawu kengin sakita kayun
- 4) Kengin ngangkat sentana langkungan ring adiri lanang wiadin wadon

Pawos 68

Swadharmaning guru rupaka patut ngupajiwèn saha ngaweruhin pratisentana :

- 1) Pangupa jiwa anut patitis grehasta ngamangguhang karahajengan pratisentana, antuk paweweh upaboga, (sandang pangan) muwah patibajampi nyabran kageringan
- 2) Ngaweruhin anut patitis brahmacari, ngamanggehang kapradnyanan sanistane nganut UU Pendidikan
- 3) Prade angka (2) kapurug, wenang guru rupaka inucap kadanda manut pararem Banjar prade tan kaanutin kadanda manut pararem Desa

Palet 12
Indik Warisan
Pawos 69

- 1) Warisan inggih punika tetamian arta bhrana saha ayah-ayahan ngupadi sukerta sakala niskala sakeng kaluhurania arep ring tutunania
- 2) Kang sinaggeh warisan, luire :
 1. Duwe tengah makadi Kahyangan/Merajan, pusaka siwa krana, ayah-ayahan, lan siosan punika
 2. Pagunakayan, tadtadan/ jiwadana
 3. Hutang Piutang
- 3) Wawu kengin kabawos warisan prade wenten :
 1. Sang mapiturun (pawaris)
 2. Turunania (ahli waris)
 3. Arta bhrana miwah tategenan/ayah-ayahan

Pawos 70

Munggwing waris ring sor :

- 1) Kengin manggeh ahli waris :
 1. Kapertama, pratisentana purusa, pratisentana pradana/sentana rajeg, sentana paperasan
 2. Kaping kalih, prade ten wenten sekadi ajeng, turunan purusa pernah ngungguhang, makadi rerama misan mindon utawi turunan purusa kasamping, makadi kaponakan misan mindon
- 2) Swadharmaning ahli waris patut :
 1. Nrima saha nguasayang tetamian pahan sakeng kaluhurania, makadi ngrempon pamerajan/pura saha pangupakarania miwah panyeledihi ayah-ayah pawaris
 2. Ngabenang pawaris saha nglanturang upacara-upacara pitara
 3. Nawurin hutang-hutang pawaris antuk tetamian pawaris

Pawos 71

Pangepahan warisan manut sakadi ring sor :

- 1) Risampun kalaksanayang pitra yadnya lan hutang-hutang pawaris buntas katawur
- 2) Pahan tetamian pada, arep ring ahli waris sajawaning wenten pasubaya pawaris sakantun maurip
- 3) Sinalih tunggil ahli waris kengin tan polih pahan prade :

1. Ninggal sesananing Agama (kawitan)
 2. Alpaka Guru Rupaka
 3. Sentana rajeng kesah mawiwaha miwah pratisentana nyeburin, soang-soang kabawos ninggal kadaton
- 4) Prade boya ahli waris kengin muponin kewanenan manut dudonan :
1. Sentana luh salami dereng kesah mawiwaha utawi alpaca guru, prade logika sanggraha mawastu madruwe pianak, sentanania inucap kengin wantah ngwaris pagunakayan sentana luh inucap makadi biyange
 2. Mulih deha/teruna, riantukan ring pawiwahan pecak sampun kabawos ninggal kadaton
 3. Balu luh wiadin muani nyeburin (boyan sentana)
- 5) Pawaris kengin mapaweweh rikala maurip, pinaka:
1. Jiwa dana, tadtadan/bekel, makacihna paweweh tetep ring ipianak sane kesah mawiwaha
 2. Pangupa jiwa, paweweh padgatakala pawaris maka pamupon hasil kemawon
 3. Padum pamong/raksa, pahan waris padgatakala ngantos padum jumenek, sakeng pawaris arep ring ahli waris

Pawos 72

- 1) Prade Sajeroning pakulawarga wenten ahli waris langkung ring adiri patut :
 1. Kawentenang paigum indik padum waris inucap
 2. Yan tan prasida, katunasang tetimbangan ring Prajuru Desa
 3. Prade taler tan wenten cumpu ring panepas Prajuru Desa, kengin nunasang ring Sang Rumawos (Pengadilan Negeri)
- 2) Prade wenten karang kaputungan, wenang prajuru mawosin (nureka) sila-sila utawi sulur pakulawarga tur nibakang ring :
 1. Ahli waris saking purusa
 2. Papernahan kasamping, yan tan wenten papernahan ngunggahang
 3. Taler tan wenten angka 1 mwah 2 kengin tiwakang ring wadon
 4. Prade rawuh ring angka 3 ring ajeng tan wenten wawu kengin sakama-kama tur magama hindu

SARGA V
SUKERTA TATA PALEMAHAN

Palet 1

Indik Druwen Desa

Pawos 73

Padruwen Desa Adat Tuban sakadi ring sor :

- 1) Kahyangan Desa makadi Kahyangan Tiga, Pura Panataran, Pura Penyarikan, Pura Puseh, Pura Parerepan Dewa Ayu
- 2) Setra wenten 3 Palemahan, makadi :
 1. Setra Alit ring Kaja Kangin
 2. Setra Ageng : Menak, Jaba manut dresta
 3. Setra Bugbugan genahnyane Kelod Kauh
- 3) Palaba Pura luire :
 1. Palaba Pura Desa, sakadi :
 - ha. Swah wenten kalig paleban sakadi :
 - Ring Subak Cuculan, Pipil nomer 777, Persil 40, Kelas I, Linggah 16.5 are
 - Ring Subak Cuculan, Pipil nomer 756, Persil 38, Kelas I, Linggah 42.5 are
 - na. Tanah Tegalan wenten kalih paleban sakadi :
 - Ring Gan Nusantara, Desa Adat Tuban, Pipil nomer 9, Persil 7 b, Kelas I, Linggah 56.5 are
 - Ring Gang Nusantara, Desa Adat Tuban, Pipil nomer 9, Persil 9 a, Kelas I, Linggah 30.5 are
 2. Palaba Pura Kahyangan Tiga, sakadi :
 - Tanah tegalan wenten tigang paleban, sakadi :
 - Ring Desa Adat Tuban, Pipil Nomer 124, Persil 3 dp, Kelas II, Linggah 87.5 are
 - Ring Desa Adat Tuban, Pipil Nomer 128, Persil 6, Kelas I, Setifikat Nomer 842, Linggah 36 are
 - Ring Margi By Pass Desa Kuta, Pipil Nomer 815, Persil 88, Kelas I, Sertifikat Nomer 43, Linggah 46,48 are
- 4) Piranti-piranti Desa Adat luire :
 1. Wewangunan Kahyangan Tiga
 2. Bale Banjar saha Bale Kulkul ring Banjar soag-soang
 3. Margi druwen Desa sane kaempon tur kapiara antuk Desa Adat manut dresta
- 5) Lelangun, makadi tetabuhan lan ilen-ilen, luire :
 1. Kulkul ring Pura Desa/Bale Agung saha kulkul soang-soang Banjar

2. Pratima, Pacanangan, lan Patapakan
3. Ilen-ilen wali Pura makadi Papendetan : Siyat Geni ring Pura Kahyangan
4. Saperangkat Gambelan
5. Barong, Dewa Ayu panyungsungan Desa Adat Tuban

Pawos 74

- 1) Tanah Palaba Pura inucap ring ajeng pamuponnya kaanggen ngaskara ring panyiwian Desa, Agung Alit manut nista madya, utama, ping kalih mecikang sahanan wewangunan inucap ring ajeng. Kekirangan prabeya tan maren karuronin antuk swadaya krama Desa manut pararem
- 2) Tanah Palaba Pura Desa miwah pamuponnya kagamel olih Banjar Pesalakan Tuban. Miwah Tanah Palaba Pura Kahyangan miwah pamuponnya kagamel olih Banjar Tuban Griya
- 3) Prajuru wenang ngetangang druwen Desa, kaanggen ngwangun utawi ngaci Kahyangan Tiga
- 4) Nyabran pasamuhan Desa/Banjar, Patengen patut nyiarang pamargin druwene ring krama saha ilikita pastika
- 5) Sakaluwiring padruwen Desa/Banjar patut wenten ilikita
- 6) Druwen Desa tan kengin kaadol katukar wiadin kagedeang, sajawaning sangkaning mabuat pisan manut kadi tatujon, saha sampun kararemin antuk Krama Desa
- 7) Yan wenten sinalih tunggil krama Desane sane tan madruwen genah paumahan mamanan jaga ngangge druwen Desa I Krama dados magenah ring tanah druwen Desa yan sampun kararemin antuk Krama Banjar/Desa tur kailikitayang olih Prajuru tut tan maren satinut ring sapituduh Prajuru manut pararem

Palet 2

Indik Karang Tegal

Pawos 75

- 1) Krama sane ngemong karang/tegal apelebahan patut ngwantesin karang/tegal inucap
- 2) Yening wenten Krama Desa ngaryanin wates karang/tegal sane nemonin wates karang/tegal panyaib/panyanding mangda masadok ring Prajuru Desa utawi Kepala Lingkungan tur ngwentenang pasubaya sareng madrebe karang/tegl panyaib/panyanding tur kasaksinin olih Prajuru Desa/Banjar
- 3) Wates sisi Kangin miwah Kaler patut kakaryanin olih Sang mdrebe karang/tegal inucap reh punika mawasta wates gegalang kaluwan

- 4) Prade Karasayang nglikadin, yan pada arsa panyaib/panyanding kengin nganggen pal sakeng Kantar Pertanahan
- 5) Prade wenten karang/tegal/paumahan sane kabengbeng punika mangda kausahayang wenten parmargi utawi uwak-uwakania
- 6) Satunggil pakarangan patut ngutsahang mangda pangutangan luire sampa, toya limbah lan siosan punika

Pawos 76

- 1) Sinalih tunggil Krama Desa/Banjar tan kalugra :
 1. Ngalah-alah margi, tanah, karang, lan siosan punika
 2. Ngalah- alah tanah sinanggeh
- 2) Prade wenten sakadi ring ajeng, sang nglahlah patut ngwaliang tanah sane kalahlah saha pamidanda manut pararem, kadulurin upakara pacaruan ring panglahlah tanah tegak suci inucap

Palet 3

Pepayonan

Pawos 77

- 1) Yan pacang nane pepayonan wiadin tanem tuwuh patut adepa agung saking wates, mangda tan wenten nawonin miwah ngletehin bilih-bilih mayanin karang panyandingnya, Prade jantos ngliwat wates wenang kasepat gantungin
- 2) Prade wenten tetanduran ngungkulin samalih mawastu mayanin kapisaga, patut kawara antuk paiguman sane becik, prasida sang nruwenang wit ngrebah utawi notor
- 3) Prade sampun kawara sakadi ajeng taler tan wenten usaha sang nruwenang wit, kengin sang rumasa kajerihan/katetehan nyadokang ring prajuru
- 4) Prajuru maritatas miwah nibakang pamutus :
 1. Ngrebah wit sane mayanin antuk panawur pati ring sang nruwenang wit anut loika
 2. Prade nyantos ngrubuhin, risampun pecak polih kaware patut keni pamidanda panyangaskara miwah prabeya manut pararem sang nruwenang wit inucap utawi sang munggul notor wiadin ngrebah pepayonan taler ngrubuhin wewangunan jatma tios

Palet 4

Wewangunan

Pawos 78

- 1) Nyabran wewangunan patut :
 1. Masadong ring Prajuru prade wewangunan inucap nganinin wates

2. Ngangge gegulak asta kosala-kosali miwah asta bumi, sanistane manut ring patitis niskala
- 2) Prade Wewangunan jantos ngayubin, bilih-bilih temboke ring telengin wates, risampun kawara tur kasadokang ring prajuru saha kaparitatas, wenang keni pamidanda manut pararem, saha tembok inucap kengin kagubar utawi sanistane mangda kakaryanang abangan sapatutnia, sadereng nembok kawentenang paigum riyin ring panyandinge
- 3) Krama sane pacang ngwangun ring karang sane boya kadruwe inggihang punika druwen Desa utawi druwen warga tiyosan sadurunge pacang ngwangun patut matuwasang baos ring sang madruwe saha nyadokang ring Prajuru Desa pinaka saksi sajeroning bebaosan gumanti patuwas bawos prasida kaunggahang antuk ilikita pastika
- 4) Yan wenten jatma liyan samakuta jaga ngawentenang wewangunan ring wawengkon Desa Adat Tuban mangda tedun makrama Desa Adat Tuban
- 5) Yaning wenten krama sane ngwangun bale/bale matumpang patut :
 1. Nganutin tata cara wewangunan sakala niskala saha nunas warah-warah guru Wisesa minakadi Dinas PU Kabupaten
 2. Nganutin kasukertan Desa tur nenten ngletehin bilih-bilih mayanin panyandingnya wiadin Kahyangan Desa

Palet 5

Indik Wewalungan

Pawos 79

- 1) Warga Desa sane miara sakelui wewalungan patut siaga nitenin negul, nglogor, wiadin ngandangin mangda tan ngrusak karang utawi pabianan krama tiyosan bilih-bilih jantos ngranjing ngletehin Kahyangan Desa
- 2) Yaning wenten sakadi ring ajeng sang katiben patut mglungguhang taler tan katitenin patut kasadokang ring Prajuru Desa mangda katiwakin pamidanda sakadi ring sor :
 - ha. Ngwaliang wit sane karusak miwah nuku prabeya kapocolan
 - na. Prade wewalungan inucap ngranjingin Pura miwah priyangan Desa sang madruwe wewalungan patut katiwakin pamidanda prabeya upakara pamarisadha sapatutnia
- 3) Wewalungan sane inucap ngletehin Kahyangan minakadi sarwa sato agung suku pat luire : sampi, kebo, bawi, kambing, domba, jaran, lan siosan punika

Pawos 80

- 1) Tan kalugra ngangon utawi ngandangin wewalungan ring :
 1. Palemahan Pura wiadin Kahyangan Desa
 2. Tegal paabyanan krama tiyosan
- 2) Yaning wenten inucap ring ajeng katiwakin pamidanda panyagaskara manut pararem

SARGA VI
NGUWAH NGUWUHIN AWIG-AWIG

Pawos 81

- 1) Yaning wenten pari indikan sane durung menggah ring awig-awig puniki wenang Keliban Desa Bendesa Adat kasarengin antuk prayoga sane lianan miwah panglingsir mawosang tur mutusang.
- 2) Nguwah-nguwuhin daging awig-awig wenang maduluran paruman Desa madasar antuk paras paros sarpanaya mawastu dados giluk saguluk, salunglung sabayantaka.

Pawos 82

- 1) Sajeroning nglaksanayang awig-awig puniki prajuru Desa patut taler mawirasa ring sang Guru Wisesa.
- 2) Awig-awig puniki kasurat madasar antuk awig-awig sane wantah sampun riyinan, sane kaanggen titi pangancan olih prajuru Desa Adat Tuban ngamargiang Desa Tata Cara, manut Dharmaning Agama.

SARGA VII



PAMUPUT


Pawos 83

- 1) Awig-awig Desa Adat Tuban puniki puput kapiarem ring Pura Desa Tuban rahina Anggara Pon, Wuku Merakih, Ingkel Buku, Pananggal ping pitu Sasih Kadasa, Içaka 1915, utawi tanggal tigang dasa sasih Maret warsa 1993 Maschi.
- 2) Awig-awig puniki ngawit kamargiang ring sawewengkuan Desa Adat Tuban saking rahina kapiarem inucap.



(3). Awig-awig puniki kalingga tanganin olih Prajuru Desa Adat, miwah Kelihan Suka Duka Banjar sawidangan Desa Adat Tuban.



ha. Prajuru Desa Adat Tuban :

Bendesa Adat Tuban Panyarikan
 
Nyoman Sondra. Wayan Letos.




na. Kelihan Suka - Duka Banjar :

Kelihan Suka Duka Pesalakan - Tuban. Kelihan Suka Duka Tuban Geriya.
 
Nyoman Suwena. Wayan Sura.



ca.  WALA KELURAHAN TUBAN

LURAH TUBAN

MADE ARI

ra. MAKA MURDANING PAMIKUKUH
BUPATI KEPAJAJARAN DAERAH TK. II BADUNG


BAGUS ALIT PUTRA



USUNAN PANITIA PENYUSUN AWIG - AWIG

- I. Penasehat : I Nyoman Sondra
- II. Ketua : I Nyoman Geria, SMHK
Wakil ketua : I Made Dasi
- III. Sekretaris : I Wayan Baret
Wakil Sekretaris : I Wayan Sukaita

- IV. IV. Komisi "A" (Periyangan) :
 - 1. Ida Bagus Raka : Ketua / Anggota
 - 2. I Nyoman Suwena : Sekretaris / Anggota
 - 3. I Made Kupug : Penterjemah / Anggota
 - 4. I Wayan Berit : Pelapor/ Anggota
 - 5. I Made Rana : Anggota
 - 6. I Nyoman Runes : Anggota
 - 7. Drs. I Wayan Wesna Astara : Anggota
 - 8. I Nyoman Runis : Anggota
 - 9. I Wayan Letos : Anggota
 - 10. I Nyoman Sumarsa : Anggota


- V. Komisi "B" (Pawongan) :
 - 1. I Nyoman Geria, SMHK : Ketua / Anggota
 - 2. I Made Dasi : Sekretaris / Anggota
 - 3. I Wayan Sukaita : Penterjemah / Anggota
 - 4. Drs. I Wayan Mendra : Pelapor/ Anggota
 - 5. I Ketut Kaluk : Anggota
 - 6. I Ketut Roma : Anggota
 - 7. I Nyoman Ganti : Anggota
 - 8. I Made Duara : Anggota
 - 9. I Nyoman Jiwa, BEE : Anggota
 - 10. I Wayan Nana : Anggota

- VI. Komisi "C" (Palemahan) :
 - 1. I Wayan Baret : Ketua/ Anggota
 - 2. I Wayan Sukaardana : Sekretaris / Anggota
 - 3. I Gst.Putu Widia : Penterjemah / Anggota
 - 4. I Wayan Dharmawan : Pelapor/ Anggota
 - 5. I Made Rengkeg : Anggota

6. I Ketut Lenen : Anggota
7. I Nyoman Mandra : Anggota
8. I Nyoman Mudra : Anggota
9. Ir. I Nyoman L. Astawa : Anggota
10. Drs. I Made Murda : Anggota


PANITIA PENYUSUN AWIG - AWIG
DESA ADAT TUBAN

Ketua,



I NYOMAN GERIA, SMHK

Secretaris,



I WAYAN BARIF